

嘉靖天長縣志

皇明天長志卷之六

邑人王心惟一編輯

知天長事餘姚邵時敏伯來刊正

人事志

文章

論議
詩歌
附著述

雜誌

論議

志林論朱壽昌

蘇軾

蔡延慶所生母已亡不爲服久矣聞李定不服所生母爲臺所評乃乞追服則知蠮匡蟬綏不獨成人之

天長志卷之六

一

弟也是時有朱壽昌其所生母三歲捨去長大刺血寫經誓畢生尋訪凡五十年乃得之奉養三年而亡壽昌至毀焉善人惡人相去乃爾遠耶余謫居於黃而壽昌爲鄂守與余往還甚熟余爲撰梁武懺引者也

東軒筆錄論朱壽昌

蘇軾

司農少卿朱壽昌方在襁褓而所生母被出及長仕於四方孜孜尋訪不逮治平中官至正郎矣或傳其母嫁爲關中民妻壽昌即棄官入關得母於陝州士

大夫嘉其孝節多以歌詩美之蘇子瞻爲作詩序且
譏激世人之不養者李定見其序大惋恨按東軒在
今瑞州府蘇轍謫監酒稅時所居筆錄其著述也

題朱源先孝子詩卷

缺

陽明先生

請改勝因寺爲孝子祠堂呈子

天長縣舉人王心增廣生員王軒等呈爲因廢寺建
賢祠以樹風聲事竊聞古有鄉先生功德在人歿則
祭于社所以樹風聲而使人慕義無窮也毀淫祠汰
僧道所以抑詭類翼聖教也照得朱壽昌天長縣秦

蘭里人棄官尋母純孝卓行照耀古今其墓見存後
人思德閔絕因宅基建勝因寺爲香火院而寓祠于
中有遺田十餘畝因以隨寺凡遇春秋本縣官屬躬
祀祠所後因凋敝齋宿不便移本賢名位于儒學
文廟東廡下暫祭墳塋無守樵鍤莫禁荒蕪傾圮久
將不識行道惻然竊念宅里無祠是謂不表寄祀無
所是謂不專不表不專鄉人何勸損政弘多本寺已
廢理不可復興僧房僅有存者心等借居講藝微加
脩理佛殿三間風雨盜竊已去其半約大就小足搆

祠堂近日高郵衛以奉例拆寺爲名申取本寺材具
修所屬衙門不知有先賢祠堂在內況基地乃本縣
土地與該衛屯營並無相干且建賢祠修官廳其益
孰大如蒙准呈乞賜俯察將尚存佛殿材具獨建祠
堂仍令本寺有行僧一人看守墳塋侍奉香火見存
僧房因留齋宿且使鄉里延師教習子弟密邇高賢
當有興起庶幾神人胥安流風罔極有益甚大理合
具呈須至呈者

戊申歲勸農文

平定李愈

本府知府

太守薄德至郡三月問民疾苦欲得其情以相安撫
僉曰食爲民天日用所急惟茲庶民苦於艱食豈無
廣土豈無良農耕者不力委諸土瘠予曰土以生物
農貴服田蕪穢不治是誰之愆古有恒產田畷教之
今若茲情意皆太守同衆寮屬奉職無狀所致也勸
相補助何患無秋我將勸之于彼東郊于是卜佳辰
率寮屬召父老勞酒肉給資助補不足嗟夫我民乘
此春和歸諭子弟告太守意務在休息更相戒督無
或游惰荒我井牧則嘉穀繁殖乃有倉積上完公稅

下長兒孫白酒黃雞社醉扶歸田家樂事莫可與伍
皞皞熙熙忘其 帝力允稱王者之民豈不快哉乃
從而祝曰爾民樂耕兮雖勞爾形實厚爾生千里
皇州既富且寧 帝力何有謳歌太平根本重地萬世以
崇爾不樂耕兮東作不勤何望西成伏臘不烹公私
並征爲太守者休戚相關寔不能坐視爾之犖犖

己酉歲勸農文

李愈

鳳陽太守李子命所屬十八郡邑之長於二月上旬
禮神次日聚郡邑村郭父老遺以酒肉給以子種州

一百五十石縣一百石以文告之曰太守無良自理
鳳陽來年餘矣體養我民務要家給人足以興德化
故民病里甲之煩也則省徭役病水患之侵也則議
阻河流病取辦之擾也則議革鋪戶汝有子弟爲汝
誨之汝有節義爲汝揚之汝有無告爲汝養之汝有
强悍爲汝治之冠婚喪祭事無巨細可以惠養元元
者罔不悉心焉故年餘來我民頗亦相安無大擾害
豈太守能亦各郡邑長福澤也去年以治郡荒大習
不事農故勞來助相勸務本業既果有秋五穀價涼

百姓粒食雖亦天時非播種耨耰何以望此則人事誠不可誣也適今農務方殷雨暘時若視勝往歲父老具醉飽我酒食携我種以歸諄諭子弟告太守意勉事東作以望西成使田畯至喜以興禮讓何如也故爰舉舊典勸之以歌俾勿壞曰使天不雨兮我民何仰雨旣沾足其勤我農兮使地無良兮我民何能地旣膏沃其勤我農兮使長無種兮我民何布種旣給助其勤我農兮使民無食兮我何所望食旣克裕其興我禮兮

請賑天長縣民文

山陰錢榧

本府同知

切照該縣古名廣陵地皆高阜而只藝稻禾一種今年自播種後亢陽久極彌野死盡別無雜糧相叅救贍又以荐荒之歲匱室弗禁所以束手就餒胥謂不日人將相食莫又如之何也再照該縣一十二里裁減小邑路當自揚達徐陸路之衝先年南北使客往來滁宿驛傳正途廩餼館舍厥有所司而民不告煩邇胥取道由徑一切廩役仰給于縣出諸常科之外增徭橫派又相仍之卑職躬履此境深竊恫心伏祈

本院再訪職言不誣乞賜批行潁州兵備道議處賑濟等情加意爲之撫恤度待斃餘民少以免夫溝壑本院仁惻所推陰德殆不淺也

祭朱孝子文

王宗尹
泗州知州

嘉靖辛丑十一月泗州知州王宗尹以公務至廣陵從陸而返道出 宋朱孝子先生墓下時旅次匆匆衣冠塵土未遑展謁旣乃宿于天長公館敬備三牲酒禮遣官操文往祭是維二十有三日也曰先生之孝可謂苦矣失母於數十年之餘違母於數千里之

外骨肉死生誰敢復異其情事之可伸也乃先生棄官入蜀指天畫日以必得母爲誓然卒迎之以歸白髮在堂老子在下備極情養以償平生嗟乎茲豈非古今天下一奇事哉使母不幸而歿於數年之前又不幸而轉之他州也去止靡定先生將何如其爲心也嘗讀列史先生五歲而孤六歲有知即念母五十尋母精神所極蓋四十餘年矣蚕叢魚鳧之險弗計其勞時遠人亡之議弗增其惑造物者且鑒其衷而曲全之也是故士患無志苟有志焉天地鬼神且陰

相之故夫衽薪膽者終以霸越甘藷粥者終以賢名
彼何人斯號宋中興擅東南數千里之雄不能還二
帝蒙塵之駕堂堂天下竟爲無父之國豈其力之不
足而策臣謀士無一可以當使者近予倅杭覽武陵
遺事而知南渡之必不可競矣流連光景志氣衰頹
北望遣使徒增歎歎嗟乎先生宋名臣也植我天常
以完民懿父子君臣相爲一體英爽如在千古一日
俛仰宗國能無感慨

天長縣志序

會稽陳元

吏部郎中

古昔盛時詔觀事則有志其專志一方如耆舊傳交
廣春秋之類名稱雖有不同其志夫民風土俗則無
不同也天長在漢爲廣陵隋爲永福至唐則以玄宗
誕日始置千秋縣而易之以此至今不廢夫天長實
振古戰爭之邑賢哲避地而典籍不存夫惟有待今
日學諭之言而後傳也咨之故老之言考之傳疑之
誤其目悉遵

國朝一統志刊定而加密以備焉夫惟沿革叅之羣書
審夫建置必有述者示不敢作也物產或廢於今而

產於古必不遺者著不敢忘也學校祠祀必特書之
所以示教也科貢選舉或累書之所以崇望也其他
歛華就實舉直錯枉非可殫紀蓋天長之境至是亦
無遺矣山陰簿徐鼐邑人也重邑侯張君之請乃以
一編求予序之君名鑑字晦之乃河間人早發賢科
出宰是邑百度維新而於此尤注意焉夫天長爲江
淮要衝民性質魯官於是恒以爲難殊不知朱壽昌
棄官迎母歸養名重天下古今周長居燕山護衛永
樂初從軍靖內難卒封萊陽伯皆天長人也今

國家教化誕敷取科第仕顯宦者先後相望而又得賢
文學爲志以遠紹職方之後吾知其自是而往賢才
彙興其必曰壽昌也長也是亦人子耳吾輩其可以
多讓哉將續書大書不一而足也是爲序

天長縣志後序

慈谿陳熙

御史

天長縣志書成縣令張君鑑者取正於吾同寅長廷
重郝先生以先生舊嘗製錦于茲深切於民社稷者
也先生不自爲德委及熙狂斐翻閱是書以序諸後
考之天長漢名廣陵隋名永福唐名千秋尋改爲天

長

國初則名仍唐之舊而改隸鳳陽背河面江其地多形勝土厚水深其地多善俗作縣前有包孝肅而後之感發多循吏愛親有朱壽昌而後之感發多孝子流寓前有樊舞陽而後之感發多勇敢死國之人是書於形勝於善俗於忠臣孝子義士無不謹書而備錄之不但登載貢賦戶口道路橋梁寺觀壇壝科甲姓氏而已一開卷而數百年之俗尚炳若丹青其所以備觀省垂鑑戒之意豈小小哉若曰是書不過旁采

摭費鉅梓以應故事則非吾之望於天長者

律呂新書註解圖算序 邑人許珍

律之爲用其大矣哉可以作樂可以審度可以嘉量可以謹權衡與九造曆制禮分田定祿以一萬物之情以立天下之信以召天地之和以格神祇平百姓而馴鳥獸者無不根本於斯焉律何自而始乎昔者黃帝命伶倫取竹於嶰谷截爲十二管有陰有陽而陰陽各六黃鍾一管又諸律之所由生也然律以出聲而亦因以候氣氣始於冬至乃聲氣之元而黃鍾

應之以十二管十二月候之而氣之應者無或爽矣
候氣之法豈泛然哉惜乎世遠人亡經殘教弛後儒
之論者或求之金石或參之秬黍或襲夫累黍之說
其云徑三分圍九分之法云徑三分四釐六毫圍十
分三釐八毫之法與古方圍周徑羃積不合者紛然
雜出是豈知求聲氣之元者耶不得元氣何以定律
而萬事亦皆無所取衷矣治不古若何足恠哉惟蔡
西山先生承父志博群書尤邃於律曆討論定著遂成
律呂新書其九寸一分之說五聲二變之數黃鐘之

徑圍變徵之非調至於先求聲氣之元而因以生尺
者班班可考是皆以獨得之見本已試之法而足以
聿新千古之誤焉然是書也前後分爲兩卷後卷證
辨即所以證辨前卷之意而正以見所言之不誣云
尔其書明白淵深縝密通暢固無毫髮之可議矣但
卷之前後稍有隔越而大全三註集覽補註又多在
總一長章之後而字畫且有微細者在初學甚有所
不便余乘暇時熟閱此書乃以後卷證辨取而入於
前卷各章之末又採三註遍覽補註及古今名儒之

所解者分貼於前章各段之下彙集成帙庶或有便於初學小童而僭妄之罪已自知其莫能遁矣

率耆老祭城隍文

餘姚邵時敏

本縣知縣

明則有人幽則有神其理一也明以誅賞幽以福殃其職一也而時敏以

朝命簡蒞茲土一民一物皆萃于躬就此而民不堪命物不聊生豈徒尔 明神之憂寔予小子之憂也顧譏薄弗勝夙夜不遑以圖萬分之一憂勤數月瘡痍如故未見毫補是蓋智慮有未周耳目有未逮而前後左右匡輔者未得其人歟二三父老若而人也自古良吏率知優禮我

太祖設亭申諭責任匪輕近時槩爲常役趨逐之不已而怒詈之怒詈之不已而廷辱之廷辱之不已而械繫之雖有奇人特士祇不過爲卯酉出入簿書俛伏而已何所建明于其間耶茲春始和布法昭憲叅諸輿論遴選惟公合新舊之役而進之于庭誨命諄諄勉期倚毗章善瘳惡推誠布公母戕母虐克慎克勤則民物之胥賴于二三父老者蓋不小矣慶澤攸歸豈

徒余小子之福亦尔 明神之必福者也古者相與
以信惟是不得已而要質于 明神之前願聰明正
直之德日惟陰隲此輩以啓余小子不及而已

尚嚮

諭父老

嘉靖戊申歲知縣邵時敏

倣古遺風槩取邑里民人行脩有能者徵爲父老禮
相待議相詢務欲合并心力共成政治集上下遠近
所知群新舊而用之迄今數月恐漸不克初乃開列

天長志卷之六

十一

姓名姑識訓詞于後

咨爾父老 遴選惟明 嗜古敦龐 同道爲朋

藹藹有言 詞顯氣宏 仰可對天 日烈雷轟

勿欺忤公 四輔股肱 弊絕風清 疇握疇倅

良氓淑衆 捍蔽如屏 帝道無虞 一人以寧

願言䟽滌 駿發光聲 寵異孔優 余敢不誠

長吏子孫 蘭馥徽稱 孟秋望日題

章善編

本職自治頗嚴望人亦切樹牌章善直欲引掖吾民

反薄歸厚以成善類蒞任逾朞未見舉錄是果行義之良難得其人抑亦公道未昭而知之者不能舉舉之者不能先也自今厥後孝子順孫義夫節婦九關風化之大者徯望且久有聞即書此外若能自勵身行表正鄉閭施仁布惠衆所稱賢者一時一事雖微必錄好善如惓母容蔽美但或粉飾一時敗壞後日仍又鏟去除名更書警頑牌內蓋善善雖長而是非實不容昧慎之哉

嘉靖戊申年秋八月立

警頑編

中人以下之性不耻不仁不畏不義欲竇雖開善根未拔猛加徵惕庶幾可悛近見民俗多淳深爲私慶但誠僞不同人品少異就有縱淫怙惡習慣爲常始以茹納之量聽其自新即今月久未見省改揭書昭示愧艾自生亦古人別慝之意凡大奸大蠹惡積難掩者依律問擬其誘引娼賻欺壓鄉民嗜利無耻駕誣越訴等項量行責治即書牌內以杜後來候一年之後果能幡然悔悟庶幾善人君子之流又當鏟名

改書章善本職好惡在民本無偏倚久久自信斷不

虛示

嘉靖戊申年秋八月立

詩歌

朱壽昌郎中少不知母所在刺血寫經求之五十年去歲得於蜀中詩以賀之 宋蘇軾

嗟君七歲知念母憐君壯大心愈苦羨君臨老得相逢喜極無言淚如雨不羨白衣作三公不愛白日升青天愛君五十作綵服兒啼却得償當年烹龍爲炙

天長志卷之六

十三

玉爲酒鶴髮初生千萬壽金花詔書錦作囊白藤肩輿簾蹙繡感君離合我酸辛此事今無古或聞長陵竭來見大姊仲孺豈意逢將軍開皇苦桃空記面建中天子終不見西河郡守誰復譏潁谷封人羞自薦
送朱壽昌使蜀七首

藹藹青城雲娟娟蛾眉月隨我西北來照我光不滅我在塵土中白雲呼我歸我游江湖上明月濕我衣
岷峨天一方雲月在我側謂是山中人相望了不隔
夢隨西南路默數長短亭似聞嘉陵江挑波吹枕屏

送君無一物清江飲君馬路穿慈竹林父老拜馬下
不用驚去裝使者我友生聽訟如家人細說爲汝評
若逢山中友問我歸何日爲話腰脚輕猶堪弄泉石
送河中通判朱郎中迎母東歸 王安石
綵衣東笑上歸船萊氏歡娛在晚年嗟我白頭生意
盡看君今日更悽然

七言短章奉送康叔郎中十九丈赴河中

沈監簿

昔年失母蓋可數緬慕推窮委虛語神明所相或有

天長志卷之六

十四

覩往往遺巾在荒土厥初使君尚垂髻夫人飄然若
羈羽如今使君半白髮夫人不知在何許契闊委蛇
五十年生死何知感勞苦棄官散金始自楚遙望秦
川如有輔一旦母子迺相遇張目望天抃且舞疾馳
朱車迎我母閭里觀瞻正如堵郡守剡章徵九五疏
封大邑啓天詒疑是語
字誤使君爲郎帶金組更著綵衣
戲當戶春風秋月歸我歡平生百疾一藥愈乞官河
中爲刺史其意那復計毫縷樂師撻金更擊鼓子母
相樂無前古我作短章送行府欲以凱風慙前詒詒
字

重押疑
有一誤

大防啓辱書索詩聊叙鄙意不足以揚盛美祇增

愧爾

呂微仲

去年謫守豫章南楚岸方舟鷁首銜君始得親夸綵
服我方違養苦征帆春來重到青山郭膝下同榮紫
綺衫尤愛中條更相類板輿時可到栖霞

送唐克已分天長教

錢塘于謙

少保兵部尚書

錢別都門日未斜青尊綠酒對黃華琴書蕭散聊爲
客冠蓋從容又過家驛路搖鞭催去馬講堂鳴鼓散

天長志卷之六

十五

棲鴉到官好寄平安字莫遣長淮入望賒

又題膽瓶梅贈別

花帶玄霜迥出塵膽瓶斜插更精神別來無限相思
意聊贈江南第一春

過天長留別馬氏諸親

莆田陳俊

兵部尚書時爲戶部主事

寵承

王命事南行道過三阿謁舊盟細雨孤燈一夜話清風明
月十年情有才莫歎淹遐僻大器終當屬老成明發
橫山又分手驅馳自是重

王程

天長道中

王高

巡撫都御史

匹馬向天長扁舟渡石梁路通樊店月人住古城岡
花縣神明府秦蘭孝子鄉白雲看不盡愁思兩茫茫

題鄭節婦卷

雲間夏寅

生與君婚死合隨九重泉壤去何之間關忍使姑垂
老勉強偷生妾不爲萬派波濤心似石五更風雨淚
如絲題詩欲爲書千紙傳與觀風使者知

又

四明陳敬宗

國子祭酒

天長志卷之六

十六

厥祥已天定授綏行及門良人苦竒疾禍福難具論
改圖父母心姑章不殊言良人力贊之無令誤新婚
節婦泣且告大信金石堅捐信重有他匪醮同二天
禮蚤丐蚤合奉湯效微悃生則事巾櫛沒當從九原
良人溘朝露毒螫腸與肝存生續其後終始義俱全
冰檠恒在懷雙淚孤燈懸白日照我心誓死逾百年
栢舟美共姜徽音期與肩

題袁公實拙菴卷

四明史敏

叅政

天長山裏袁夫子抱德懷材飫經史自甘清介隱柴

桑肯去依阿取青紫曾見他人有寸長不將直德論
行藏一時落莫偶未得百計營謀不可當或移紅杏
雲邊種或裹黃金夜深送豈知屈辱壞平生自取賤
羞成底用个人韜晦有若無株守衡茅知術踈只憑
抱甕爲迂叟誰羨高車是丈夫一朝苦爲弓旌逼白
日人期生羽翼獨行偏與衆相違古道不求人所識
慨然還返舊林丘萬事無干儘自由幸能在野閒如
鶴從笑爲巢拙似鳩名菴自此題爲拙人笑拙時心
轉悅天上休聽子厚文壁間已寫濂溪說我生抱拙
拙更多白頭衰朽成蹉跎我之歌調人笑拙夫子還
應喜我歌

天長十景

新淦李鳴盛
本縣學諭

鳳凰橋

鳳凰橋上鳳凰鳴不爲秦簫弄巧聲自此

帝鄉題柱客來儀樂觀應文明

龍馬窟
即馬塘

世傳白馬出方塘不食青苗不降殃宛似渥洼龍吸
水化爲霖雨徧天長

琉璃井

玉甃虛圓入鏡天
琉璃新長碧交連
却疑無底圖澄
鉢花發青蓮繞鉢鮮

臙脂山

縣治西山却向東
臙脂燁煜太陽中
楊妃偃卧臨金
鏡笑動春風醉臉紅

萬歲湖

湖上三呼祝祖龍
湖存龍去幾春冬
自從天命坑焚
盡萬歲聲歸火德翁

二賢廟

花縣峩峩誰建祠
二賢風雅後人師
神明猶道剗牛
事篤孝還憐刺血詩

樊公店

避秦屠狗向天長
封爵誰思到舞陽
連袂一朝同逐
鹿至今留得店名香

煬帝堤

即樂樂堤

堤上垂楊已盡摧
水流花謝鶴猿哀
當時惟有邗溝
月曾照龍舟宴樂來

石梁河

路出河西達鳳陽河東一舍到天長只今舟子招人
涉盛事猶傳架石梁

鮑家寨

康王南渡忘宗祧恢復中原志寂寥避難區區雖築
寨金兵狼虎勢加驕

右詩十首詞格頗俗以其關縣之景事也故錄
之

己酉除夕至天長

蜀人盧錦

天長志卷之六

十九

除夕無惊坐不眠強將沽酒笑燈前已知午夜是新
歲未到三更仍舊年歷歷好山行處有迢迢故國眼
中懸停杯幾度傷前事欲傍梅花問後天

庚戌元日登天長臺

前人

天長臺上望 天門門迴天高眼未昏浴鶴浪浮滄
海樹卧龍雲抱冶山村傷心萬里雙飛鴈回首三巴
一夢魂日暮有懷風正急願將春意寄蘭蓀

癸丑錦寓天長悒悒不樂賦詩以道之僅成六句
久矣未終一律忽承雲南憲副林公待用寄俸餘

以蘇旅困而律於是焉終矣

前人

腸斷岷江鬢欲絲
草堂不語自題詩
臃腫夜月人千里
寂寞西風菊一枝
未卜起居常作客
浪憑章句漫爲師
俯慙欲逐烟雲散
却憶天南有故知

辛亥寓天長季冬之夕
丹霞溢目遂乘輿而遊于
邑之東林效迴文體一首

前人

丹霞鍊出畫蒼穹
醉客詩狂欲步空
寒夜五雲潛斗

天長志卷之六

二十

北雪城孤月漏山東
盤蔬薦處飛觴急
玉海驅來落筆雄
歡盡未歸誰是伴
看梅索笑挹清風

寓天長憫農

前人

稻田初秀半云黃
田舍無人不斷腸
閑却野雲無定處
欲來爲雨怕風狂

寓天長憫旱

前人

淮泗井落煙火稀
道途纍纍欲何依
傷灾幾處飽藜藿
更有誰家多薺薇
乍見兒童走喧笑
坐聞老病長歔歔
廟堂肉食者誰子
對此惻心空布衣

寓天長書屋

前人

桑柘圍牆草結亭，盍簪仝此詠青青。
窻虛引碧侵書案，塵淨浮光點坐屏。
一片斷雲牽思遠，數聲幽鳥喚愁惺。
身閑况復忘機事，去去何慚水上萍。

送天長郝大尹之京

前人

淮揚三月饒春色，滿目繁陰半是花。
却羨美人鳴佩玉，獨餘歸鳥落汀沙。
晚移潞水聊停棹，曉渡天津爲問槎。
拾得蓬萊好風景，飛書先報野人家。

遊王橋

前人

遠尋幽僻滌煩塵，水國烟花欲笑人。
山後鳥啼雲裏樹，馬前鳩喚雨中春。
風牽荇帶如相識，草拂嵐光覺有神。
行至王橋重回首，蜀江何處可垂綸。

遊破城河

前人

勝日浮淮試遠遊，水清風暖共悠悠。
影含碧落余青草，曲盡滄浪起白鷗。
五六兒童供小酌，兩三賓客坐相酬。
徘徊流到前灘上，一笑歸來月滿舟。

問冶山歌

前人

冶山風景今如何，醉來欲卧山之阿。
巨靈莫掃山前

路恐惹閑花飛更多我來何所有風月相追呵有琴
無弦心上彈有鶴無羽空中摩落魄無解今古事獨
覓流水洗煩疴若見山中人當與一漣娑飲玄酒兮
飽大和擊筑高和無名歌歌聲短短如樵牧筑韻悠
悠近猗那忘言無一事引手折長柯折木贈我同心
人何日携我遊岷峨扣山翁問山漣冶山風景今如
何

送吾廷順之天長四首

嘉魚李承芳

大理寺丞

萬卷青編載盡航閑雲孤鶴共悠揚人才國器歸師

天長志卷之六

二十一

範風景詩囊屬

帝鄉三代青氈真故物九霄丹桂賸留香空齋兀兀渾忘
我笑倚心知是素王

舊家買斷沃州山山上閑雲相對閒把手携雲聊作
雨萬株開遍杏花壇

尼父壇上琴杏花共淪落古調無人彈神交入冥漠
濠上君遊處遊魚問訊無波光照心曲知已在嘉魚

謝致仕徐二尹

吾尋

家山歸臥歲已久春風忽憶淮南酒孤帆一片落天

長壽昌墳下正花柳橐中無金結賓客旅次獨酌頻
搔首燕語鶯啼春遽闌歸期恐落他人後少尹徐公
俊爽人愛賢下士不啻口邀客聯鑣及我門仍載殺
核列釘餽家釀新開琥珀光樽蒲漫擲琉璃珠走高談
況是九老儔個儻更得青雲友狂歌痛飲忘主賓盤
桓自午直至酉愧我衰年樗櫟材欲報無因得瓊玖
予在天長仲子鶯應湖廣聘至自文安食間口占

吾尋

父子弟兄三地隔天長偶爾共盤杆因思風雨彭城
夜還欠皤然一老蘇

觀琉璃井

吾尋

和氣能鍾瑞英靈自吐竒一泓金井水四畔碧玻璃
清澈疑冰鑑光芒比刷絲我來尋勝跡忘却在天涯
曉發天長馬塘王翁留宿贈言二首

吾尋

霜晴風日不生寒躍馬渾忘道路難況有主人能愛
客華燈高宴酒盃寬
衣冠相送別天長晚宿三槐逸老堂香冷月高沉醉

後薰然一榻盎春陽

予祇役代祀

祖陵經天長雨中過汭澗時楊尹中啓作宰有聲構茲館
而予適憇焉乃爲書此

陽峯張璧

南京禮部尚書

徑仄曉仍滑霜寒風正淒
寒帷臨淺水騎馬倦衝泥
汭澗行堪憇 橋山望不迷
新亭初良宰勞劇暫幽
棲

送魏稅宰還天長

朱源

朱子裔今居
贛州府

天長志卷之六

二十四

少卿吾遠祖古卷墨流香
熙寧隆孝義南渡徙榆桑
送別雙江去相思千里長
君家多俊彥相續此留芳

朱壽昌祠有感

汝陽桂祥

本州知州

萬里兒無母一朝兒有身
音容如再世爵祿即飛塵
九月先君歿終天此恨新
寫經果重見濡血豈辭頻

至天長

桂祥

澤國偏逢雨城門更阻河
登舟悲物態下馬聽絃歌
農事年來薄官征歲積多
無才可抗疏厚祿意如何

石梁河

桂祥

石梁何日斷春水正平川泛泛扁舟小搖搖百丈牽
浪高風不息雲濕雨常懸擊楫空懷古乘槎擬挾仙
羈棲淮海客惆悵廣陵絃適意惟歸去故鄉花滿川

天長謁二賢祠

任丘袁淮

知州

冒雨入山縣驅車晚吹微郭田通澗水城嶼對江扉
神宰傳牛舌思親戀布衣高賢吾所仰瞻謁自忘歸

天長行臺

龍

御史

老無康濟術行脚尚塗迷案牘寒還暑舟車東復西
舉餐驚早潦入坐耻棖題旅枕不成寐夜深花影低

天長志卷之六

二十五

天長行臺

上蔡張惟恕

巡按御史

天長晚發過晴陂九夏丹心一劔知巧鳥暗傳風日
好小秧綠動水雲遲柳烟嘶馬微茫處花氣薰人困
頓時駐節野亭凝晚眺盱山却引故鄉思

朱孝子祠堂成寄王二山

進賢朱廷稷

天長秦蘭鎮朱公宋名卿名卿惟孝子至性鍾孩嬰
七齡母氏出心知含鬱縈深恩掩大義不敢貳所生
怡怡事嚴君愛敬敦其誠垂老乃孤立主祀紹先明

中心念母氏有感竟合并同州一相見泪下如泉傾
尋母非死父棄母難爲情禮辨君子志舉一不可貞
君看王蘇篇贈咏森法程但恨世代遠金元混戈兵
雲仍沒轉徙墳墓餘空名故址圯畝隴斷碑踣榛荆
徒有梵王宮據勝峙崢嶸廢興一如此行道爲弗平
侃侃王孝廉俯仰雙目瞪乃惜高誼墜乃惡異教橫
因革限分力文字費啓呈藉材新棟宇仍垣高閉閤
有祠維創建有院與偕成祠以表宅里院以樹風聲
仁孝通天地心心相招迎觀感得典則焉用汝南評
賤子江海身到處寄浮萍息肩祠院內企仰從群英
作歌表景行聊比春鳩鳴

送楊大尹

邑人崇岐鳳

古人議論平如砥公是公非千載裏今人持論殊未
公是非予奪如轉蓬憶昔公來宰山邑勵勤茹苦衆
事集厥終如始誓弗渝迥野不聞向隅泣異哉隣令
聲琅琅猛於虎兮貪於狼苞苴朝參與暮謁一部鼓
吹成三殤何如公心勤撫字飲彼醇醪民盡醉一廉
應不酌貪泉懶效爭鳴燕雀類往年宦豎紛如毛天

兵沓至聲嘈嘈執挺號呼勢莫犯應荅如響民奚撓
勲庸如許儔與伍祇以正靖爲時俯幸有行人口似
碑公論昭昭森若斧江湖牢落半鷄棲生平心事誰
得知青蠅點此垂棘半語向蒼穹神獨怡公不見蕙
苾珠犀謗尤盛至今清節仍傳頌安得我口如懸河
洗雪公冤復時用

釋迦寺作

崇岐鳳

招提聊寄迹野趣望中迷竹逕斜通寺松濤半和溪
排雲翔獨鶴踏浪浴雙鷺適興忘機處歸來月色低

天長志卷之六

二十七

同人書院分韻得孤字

崇岐鳳

故人咫尺費招呼蹀躞變寒風路轉紆賦就馬頭分韻
和興狂月底過橋沽百年事業心同壯萬古乾坤道
不孤肯許斷金堅舊約直須鳴劔向伊吾

玄妙觀和韻

崇岐鳳

乘閑聊自適徐步到仙家風靜棋聲遠簾疎樹影斜
野雲依石徑春信到梅花靈境真堪樂何當醉晚霞

挽王直養翁

邑人鍾暘

依依草上塵涓涓葉下露人生宇宙間奄忽同所寓

嗟嗟養直翁未老已捐世朝爲高堂歡暮歸重泉路
振策指靈丘駕言不返顧哀哀遺二孤終天失其怙
白日沉虞淵颺風發高樹青燈慘總帷淚下疾如注
大覺寺次楊員外韻 鍾暘
落木蕭蕭坐語鴉輕烟冉冉出鄰家諸天繪壁藤蘿
合百代金身雨露賒雲起作鬢山護髻魚來吹沫水
生花方袍跏結心無事石上焚香了法華

贈大覺壽堂和尚

鍾暘

當年卓錫何許人辟土頓成祇陀林一指代啓甘露

門般若正嫡今猶存存者爲誰壽堂老艱難更使招
提好構樓架閣功不小翬飛鳥革林之杳粉墻丹柱
光彩生圖畫鬼物填紅青金身巍巍烟霏層座隅拱
立摩尼瓶左右蟠曲虬與龍規摹大抵侯王同潭之
水涵泓噴薄清無底魚龍叫嘯烟雲起亦有山孤峯
聳入青雲間恠石巖巖虎兕參篔簹風弄雜琴瑟松
栢露灑含膏泣藤蘿怒縛椒蘭曲莓苔漫染堦除濕
獨鶴起舞當窓前簷牙百鳥聲啁喧兩兩鹿子壁底
眠窮猿側挂長崖顛壽堂祝髮經幾時霜眉碧眼頭

骨奇跣趺終夕不爲疲杖藜起步還徐徐池邊汲水
月入孟洞口立石雲生衣嗚呼壽堂信爾能忘機信
爾能非非金繩寶筏曾有餘八萬四千將何如我時
會戰天下之士輸一籌空房借我來藏修壽堂頻賁
茗邀坐北窗幽間一角彼已翕然隨以收惜哉少壯
不可留冠巾斂束將奚由爲爾歌述開爾儔

過石梁河

一水來滁灤澄清應碧虛古城凝望遠衰柳夾堤踈
止賴商家楫時通長者車村中省畊早春滿石梁畚

朱孝子迎母

身外功名薄思親苦志懸布袍尋遠道白首顛蒼天
何日母重會中秋月樣圓蜀川逢面目襮綵勝青年
重九書齋小集乙酉歲 邑人王心

道人絕塵想有客相追陪庭梧葉盡落籬菊參差開
秋瓜被短墻霜荳蔓蕪臺山齋况偏遠對此興幽懷
濁酒情人賒展衣坐蒼苔飛霞掠席過清風拂袖來
佳辰幸勿負且進茱萸盃

東丘聯句丙戌歲時會者張漢子明羅璫文烈張

大訓國典王心惟一

行行出東門坐飲小丘上心平湖開一鏡遠山列雙

障漢况茲清明天景物方駘蕩璫嘉芹秀幽澗流鶯

語修篋訓岸柳搖金絲園桃噴紅浪心雜沓看花人

行歌互要倡漢廓哉俯仰間化工無盡藏璫邈矣浴

沂子千載一趣向訓

同人書院賞菊分陶靖節飲酒第四首韻

王心

秋杪衆芳歇孤鴻鳴且飛江亭一以眺搖落正堪悲

亭亭井傍菊開花自相依欣然坐花下日暝竟忘歸

把酒嗅清香忽感歲月衰願言媚佳人及時莫自違

重陽飲玄妙觀己丑歲 王心

木葉翻風自作堆菊花冒雨未全開也將談詠償佳

節聊共交遊盡此盃山靄數峯青隱隱湖秋千頃白

皚皚萸囊醉後都忘却落日江城角鼓催

養疾秦蘭寺用少陵韻癸巳 王心

七月六日余臥病對語乘風暫不能一卷金剛馴活

虎古人以生龍活
虎喻心之難制半甌白粥來青蠅僕子小生休戲

謔山僧俗客何頻仍擁膝焚香還獨坐凌人啓我少

陰冰

醫家以腎經爲少陰

中秋勝因寺同諸友翫月有感癸巳

王心

又從荒寺得中秋萬里清光意轉幽薄酒頻頻深對

客陰雲片片起孤愁墻邊但見吳牛喘

時旱甚

海上猶

虛漢使舟落木蕭蕭催短笛振襟長嘯一登樓

同人院聽雨

王心

萬壑飄風息空堂暮雨斜蕭蕭隨落葉細細濕鳴鴉

引興江湖遠驚心歲月賒酒酣凭竹几吟罷落燈花

甲午正月七日夜遊仙人墩 王心

湖月泠泠湖水平柳溪撐出一舟輕仙人墩上三盃

酒雲露沾衣鴈影橫

洋湖十里仙人墩半夜同舟往問津不見仙人聊獨

醉一湖明月一墩雲

布穀鳥吟

王心

布穀鳥布穀鳥年年布穀催春早農家豈不欲乘時

今年種缺牛病倒

紡緝婆吟

王心

紡緝婆紡緝婆
夜夜紡緝布幾多
兩股戛磨聲不歇
赤身其柰秋風何

六月十八日夢鶴王大尹見召奉陪應谷劉司徒

鼓樓晚宴

王心

六月樓中爽氣生
倦遊登覽更多情
向筵山色南來秀
繞郭湖波北去平
細雨人家千樹綠
浮雲天際一江橫
撫時極目愁無限
共語停盃月在城

次周後溪偕諸子登青雲樓之韻

天長志卷之六

三十一

王心

青雲有逸客
弭節青雲樓
天地炎蒸散
江山爽氣收
薄遊應萬里
暫憩已三秋
騎鶴明朝去
諸生附翼優
先聖宮前地
危然創有樓
紫微天上近
瓊島坐中收
壇杏開三月
雲鵬奮九秋
追陪吾所願
賞論興殊優
謁包孝肅公祠
保昌朱仕夔
儒學教諭
巍巍廟貌壯
淮濱孝肅神明
此肇裡五百年
來一瞻拜
慕公誰是繼
公人明月清風
萬古眞想像
笑顏何處慕
公誰是繼
公人明月清風
萬古眞想像
笑顏何處

覓黃河澄澈見公神

謁朱孝子祠

朱仕夔

蓼莪芳草盍湖濱俎豆弘開百代裡不以三公輕一
養血經耿耿照吾人

血經耿耿照吾人孝子肝腸鐵石真思母棄官終見
母知君此念自通神

登青雲樓

朱仕夔

一上雲樓眼界新杏壇深處萬年春宮牆外望慚無
見誰是升堂入室人

天長志卷之六

三十三

誰是升堂入室人獨從高妙苦潛心孔門聰辨知多
少不及如愚一個真

琉璃井

沔陽張鍊

儒學司訓

何年穿此井虛罄結琉璃豈是人爲巧皆由造化司
澄寒源不竭甘潔性無移寶地鍾靈異如來道在茲

送王苻池之廣西

張大訓

秋風江上賦蒹葭此日君乘漢使槎八桂望迷東隘
險片帆飛渡洞庭賒周程祠下餘青草

二祠在省城內

堯舜

山前憶翠華

二山在省城外

文教朔南同甸服爲官何必歎

天涯

步魏冶泉王橋寺韻

張大訓

飛花冉冉報春殘與客閒遊到法壇
匝寺好音雲正落滿溪芳草露初乾
縱眸欲泛湖千頃發興還憐竹數竿
漫道浮生空碌碌明時事業擬彈冠

遊王橋寶林寺

魏濂

閑來無事惜春殘與客尋幽到梵壇
盤薦野蔬情更愜樽開家釀興殊寬
隔溪草長牛披亂落席花飛燕蹴乾
育物對時須自愛莫教白髮愧儒冠

天長志卷之六

三十四

登冶山

魏濂

幾年有約共登山此日春明却趁閒
直上蒼崖招白鶴俯凭危閣瞰塵寰
暖風蕩漾薰人醉野鳥忘機送客還
路轉山腰天欲暝鍾聲隱隱翠微間

王橋寺次冶泉韻

吳恕

一片花飛春已殘王橋佳會啓吟壇
長才觸景詩先就老衲開尊酒欲乾
豪俊會看題鴈塔踈慵終恐伴漁竿
獨忻別業青山在時醉花前倒着冠

王橋寺次冶泉韻

曹恩

黃鸝聲裏杏花殘却憶生公說法壇橋北漫尋芳草
綠溪南共泛酒盃乾庭翻老鶴松千尺座拂清風竹
一竿半日偷閑真雅會乘時正欲共彈冠

青雲樓次韻

曹恩

路入青雲裏同登百尺樓乾坤歸勝覽桃李荷甄收
江海十年夢雲霄萬里秋與君盟出處共沐

聖恩優

臙脂山

慈谿陳虞化

野山不見粧臺面誰把臙脂鏡日鮮東望西圖渾不

天長志卷之六

三十五

鮮却疑紅雨墮山前

琉璃井銘

陳虞化

眞勝有井琉璃是名匪今溢美繫惟奇徵淆之不濁
清清曷澄歲久凝碧光瑩虛明淵瀦良潔澤爾生靈
振古清德貪污是懲

附著述

景泰天長縣志一卷本縣儒學教諭吳珪撰
弘治天長縣志二卷本縣儒學教諭吾翕撰
太極圖解釋義一卷已刊正蒙分節註解十卷未刊

律呂新書註圖便覽五卷未刊以上三書皆邑人許

珍彙集

易經本義衍翼邑人王心撰

羨魚說一篇邑人張昊撰

直養遺稿二卷邑人王浩撰

鷺洲遺稿一卷邑人鍾暘撰

雜志

雜志四明黃潤玉著海涵萬象內載南京浦子口入六合天長縣有河出高郵與湖水勢相平只移邵伯

天長志卷之六

三十六

兩閘置湖口亦可則漕船免儀真過壩前陳御史具奏二次俱被儀真人囑部不行

心按由瓜步有河入六合通滁州抵來安之竹鎮蘆龍鎮井欄之石其先已斷弘治間漸合尚有縫今則如完石矣無根之石斷而復完甚可異者

琉璃井津液凝結瓷甃之上狀如琉璃上下爲一光潤圓綴甚可異者

唐僖宗廣明元年秋七月黃巢兵圍天長見綱目

中和二年楊行密入天長見五代史

宋高宗建炎三年二月金粘沒合陷天長軍

建炎四年揚州郭仲威救楚州按兵天長不進

紹興四年韓世忠大敗金人于大儀遣其將董收敗

金人于天長之鷓口橋

元順帝時天長青軍戍淮安賊兵圍淮安青軍叛見

元史

太祖高皇帝車駕幸橫冶山本縣張童倪者朝見命有司

賜瓦房三間

皇明天長志卷之六

